

Conocido locutor di radio, Johnny Habibe a fayece

Ayera mainta comunidad di Aruba a ricibi e tristo noticia cu conocido locutor y propietario di Hit94 FM, Johnny Habibe a ser haya sin bida na su cas.

Habibe tabata conoci como un talentoso locutor, kende a traha na 99.9 y Canal 90, prome cu a ricibi su propio licencia di radio.

A traves di un publicacion riba Facebook e pagina di historia local 'Nos Historia Nos Herencia' a publica biografia di Habibe y su trayectoria den e mundo di periodismo y radio.

Habibe a nace na Aruba dia 11 di Februari di 1954. Na aña 1968 cu apenas 14 aña di edad Habibe a cuminsa su carera como locutor na Radio Voz di Aruba.

Na 1970 Habibe a labora na Radio Carina y despues na aña 1976 el a traha cu Radio Kelboom y despues Radio Caruso Booi. Den decada 80 Habibe tabata un di e locutornan popular na Canal 90.

Na comienso di añanan 90 Habibe a bira director di Radio Galactica 99.9 y despues di Radio Galactica el a bira



director y propietario di Hit 94.

Na Television tambe Habibe tabata presentador di e programa "Soul Train".

Habibe tabata popular pa programacionnan manera "Discolandia", "Generation 90", Johnny's Oldies" y "Aruba's Top 20 Hit Parade".

Na nivel internacional Habibe a traha cu Radio RQ 910 y RCR Radio Caracas Radio y tabata coresponsal pa RCTV Radio Caracas Televi-

sion.

Durante añanan Habibe a sigui diferente curso di periodismo, locucion y maneho di radio.

E tabatin 55 aña den radio difusion y a traves di añanan a logra diferente premio pa su labornan na radio.

Di parti di Bon Dia Aruba ta manda condolencia y hopi forza pa sernan keri di Johnny Habibe na e momentonan dificil aki. Cu Jhonny sosega na paz.

Jason Kelly y Maryjane Vrolijk corona como Rey y Reina di Dande 2024



Den fin di siman a tuma luga festivalnan di dande. Festival di Dande Infantil y Hubenil a tuma luga diasabra 28 di december na Centro di Bario Tanki Leendert y Festival di Dande Adulto a tuma luga diadomingo 29 di december na Club Caiquetio.

Festival di Dande Infantil y Hubenil tabatin cuater diferente categoria y un total di 14 participante.

Den categoria 4-6 aña tabatin un participante so, Zaydianne Filiciana ken a keda corona como Reina di Dande.

Den categoria 7-9 aña Elizee Bislip a bira Reina di Dande, Ksijayli Croes a keda na di dos luga y Alyna Henriquez a keda na di tres luga.

Den categoria 10-12 aña Kitai de Jongh a bira Reina di Dande, Jaymerson Kelly a keda na di dos luga y Kacey-Ann Dania a keda na di tres luga.

Den categoria 13-17 aña Lizienne Webb a bira e ganadora absoluto y Reina di Dande, Stephanie Quant a keda na di dos luga y Reanne Ras a keda na di tres luga.

Pa loke ta trata Festival di Dande Adulto, e aña aki e festival a celebra su di 52 edicion di y e maximo ganadornan di anochi a keda den persona di Jason Kelly como Rey di Dande y Maryjane Vrolijk como Reina di Dande.

Na segundo luga den e categoria masculino a keda Jonathan Croes y na di tres luga Glenbert Bislik.

Den e categoria femenino na segundo luga a keda Raquel Lampe y na di tres luga Priscilla Quant.

Den e categoria di cancion Tipico prome luga a bay pa Tipico Stimami cu nan cancion Cayena, na di dos luga Frank Croes y su Tipico Pega Saya cu su cancion Potpurri di Wals y na di tres luga Tipico Colegio cu nan cancion Madua.

Den e categoria di propio composicion, prome luga a bay pa Sabor Crioyo cu nan cancion At'e Dande a yega, na di dos luga a keda Frank Croes y su Tipico Pega Saya cu nan cancion Aña nobo, bida nobo, y na di tres luga a keda Tipico Poco Loco cu nan cancion Laga e Dande resona.



Alhambra
CASINO AND SHOPS

Nos ta desea bo

2024

Un feliz aña nobo

Open daily 10am to 3am | J.E. Irausquin Blvd #47 | 583.5000 | casinoalhambra.com

Play Responsibly. Visit www.gamblersanonymous.org if you or someone you know has a gambling problem.